

**MALAYSIA**

**DEWAN RAKYAT**

**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI ISNIN, 16 NOVEMBER 2015, PUKUL 10.00 PAGI**

**Bil. 50**

---

**PERTANYAAN-PERTANYAAN BAGI JAWAB LISAN**

1. PR-1333-L69547  
**Dato' Haji Irmohizam bin Haji Ibrahim [ Kuala Selangor ]** minta **PERDANA MENTERI** menyatakan sejauh manakah kaedah pembinaan berasaskan *Industrialised Building System (IBS)* dan *Modular* dapat mempercepat tempoh siap pembinaan Rumah Kekal Baharu (RKB) yang perlu dibina oleh Kerajaan Persekutuan untuk mangsa banjir.
2. PR-1333-L70134  
**Ust. Datuk Dr. Mohd. Khairuddin bin Aman Razali [ Kuala Nerus ]** minta **MENTERI PERDAGANGAN ANTARABANGSA DAN INDUSTRI** menyatakan prestasi pelaburan dan perdagangan di negara ini serta menyatakan sejauh mana ia terkesan dengan atau memberi kesan terhadap harga minyak dan nilai Ringgit semasa.
3. PR-1333-L70201  
**Datuk Joseph Salang anak Gandum [ Julau ]** minta **MENTERI KOMUNIKASI DAN MULTIMEDIA** menyatakan persiapan membekalkan semua menara komunikasi di kawasan T3 dengan teknologi 3G atau 4G atau yang lebih canggih.
4. PR-1333-L70107  
**Tuan Nik Mohamad Abduh bin Nik Abdul Aziz [ Pasir Mas ]** minta **MENTERI DALAM NEGERI** menyatakan tindakan bagi mengawasi penapisan filem negara.
5. PR-1333-L69523  
**Datuk Dr. Haji Abd. Latiff bin Haji Ahmad [ Mersing ]** minta **MENTERI PERTAHANAN** menyatakan status terkini dua buah kapal latihan TLDM yang dibina oleh Syarikat NGV Tech dan usaha-usaha yang diambil oleh pihak Kerajaan untuk menyelamatkan pembinaan kapal berkenaan yang dianggarkan telah siap 70% pembinaannya.
6. PR-1333-L69769  
**Tuan William Leong Jee Keen [ Selayang ]** minta **PERDANA MENTERI** menyatakan jumlah kejadian dan orang yang terbunuh dalam bot pendatang asing tanpa izin yang karam atau kemalangan dalam tempoh 5 tahun yang lalu dan langkah-langkah untuk memantau dan mencegah tragedi-tragedi tersebut.

7. PR-1333-L70231  
**Dato' Haji Zainudin bin Ismail [ Jelebu ]** minta **PERDANA MENTERI** menyatakan :-
  - (a) tahap keseriusan (*seriousness*) kebocoran maklumat Kerajaan dan bagaimana Kerajaan mahu menangani isu ini; dan
  - (b) sehingga kini berapa ramai anggota pentadbiran dan lain-lain yang telah diambil tindakan di bawah Akta Rahsia Rasmi (OSA) dan apakah Kerajaan berpuas hati dengan keberkesanan OSA yang sedia ada atau bercadang untuk mengkaji semula.
8. PR-1333-L71510  
**Dato' Takiyuddin bin Hassan [ Kota Bharu ]** minta **MENTERI PERDAGANGAN ANTARABANGSA DAN INDUSTRI** menyatakan jumlah pengaliran keluar modal asing yang berlaku sepanjang tahun 2015 ini dan juga sektor-sektor utama yang terlibat.
9. PR-1333-L70308  
**Tuan Che Mohamad Zulkifly bin Jusoh [ Setiu ]** minta **MENTERI KERJA RAYA** menyatakan bilakah Lebuh Raya Pantai Timur Fasa 2 (LPT2) akan beroperasi sepenuhnya dan bagaimanakah agihan pegangan saham antara pemegang konsesi dengan Kerajaan Negeri Terengganu.
10. PR-1333-L70866  
**Tuan Chong Chieng Jen [ Bandar Kuching ]** minta **MENTERI PENDIDIKAN** menyatakan adakah Kerajaan Persekutuan akan bersetuju dengan pemulihan penggunaan Bahasa Inggeris sebagai bahasa pengantaraan untuk pengajaran semua mata pelajaran di sekolah-sekolah mubaligh negeri Sarawak.
11. PR-1333-L70722  
**Datuk Seri Noh bin Haji Omar [ Tanjong Karang ]** minta **MENTERI KERJA RAYA** menyatakan apakah status terkini projek Lebuh Raya Damansara - Shah Alam (DASH) dan adakah sebarang kekangan daripada Kerajaan negeri. Sekiranya ada apakah kekangan yang dihadapi oleh pihak Kementerian.
12. PR-1333-L69657  
**Dr. Che Rosli bin Che Mat [ Hulu Langat ]** minta **MENTERI KESIHATAN** menyatakan usaha dan bantuan yang diberi dan akan diberi dalam membantu Hospital Kajang mengatasi kekurangan katil dan kemudahan peralatan perubatan dalam menghadapi pesakit yang meningkat termasuk pesakit Denggi.
13. PR-1333-L70033  
**Datuk Wilson Ugak Kumbong [ Hulu Rajang ]** minta **MENTERI KEWANGAN** menyatakan sekiranya pihak Kementerian ada cadangan untuk membuka sebuah bank di BRS Sungai Asap, Belaga.

14. PR-1333-L70047  
**Raja Dato' Kamarul Bahrin Shah [ Kuala Terengganu ]** minta **MENTERI PERTANIAN DAN INDUSTRI ASAS TANI** menyatakan walaupun kenyataan Kementerian di Parlimen pada awal 2015 mendakwa beratus lesen bot Vietnam telah dibatalkan, nelayan pantai timur masih mengadu bilangan mereka masih besar dan tidak berkurangan dan malahan pencerobohan perairan Malaysia meningkat.
15. PR-1333-L69509  
**Dato' Wira Othman bin Abdul [ Pendang ]** minta **MENTERI KEWANGAN** menyatakan apakah tindakan yang telah diambil ke atas syarikat-syarikat yang tidak menghantar penyata pungutan GST setiap bulan. Berapa banyak syarikat yang telah diambil tindakan sehingga kini.
16. PR-1333-L70760  
**Dato' Johari bin Abdul [ Sungai Petani ]** minta **MENTERI KEWANGAN** menyatakan :-
- (a) berapakah nilai hasil dan *revenue* yang dikutip oleh Kerajaan Persekutuan dari Sabah dan Sarawak setiap tahun dari tahun 2010 hingga 2014; dan
  - (b) senaraikan jenis-jenis hasil dan *revenue* dan nilai mengikut tahun.
17. PR-1333-L69493  
**Dato' Sri Haji Abdul Azeez bin Abdul Rahim [ Baling ]** minta **MENTERI KERJA RAYA** menyatakan apakah tindakan yang diambil oleh pihak Kementerian untuk membaik pulih semula Jalan Trans Eastern Interland Highway (TEKIH) Seksyen 36.00-36.30 laluan Weng-Gulau Baling yang terbengkalai akibat tanah runtuh memandangkan jalan ini sepatutnya telah dibuka dan menjadi laluan alternatif antara daerah Baling, Sik dan Padang Terap.
18. PR-1333-L70216  
**Dato' Ngeh Koo Ham [ Beruas ]** minta **PERDANA MENTERI** menyatakan kenapa selain daripada Pejabat Pos dan Pejabat Suruhanjaya Pilihan Raya, hanya ketua-ketua kampung yang dilantik oleh Kerajaan Persekutuan di benar mendaftarkan pengundi-pengundi baru.
19. PR-1333-L70727  
**Datuk Noor Ehsanuddin bin Mohd Harun Narrashid [ Kota Tinggi ]** minta **MENTERI KEWANGAN** menyatakan apakah kedudukan pasaran suzuk di Malaysia dan berapakah jumlah terkini nilai pasaran suzuk di Malaysia serta kedudukannya di pasaran global.
20. PR-1333-L70684  
**Dr. Haji Izani bin Haji Husin [ Pengkalan Chepa ]** minta **MENTERI PENDIDIKAN** menyatakan statistik guru-guru yang tinggal di negeri berasingan dengan pasangan disebabkan penempatan mengajar yang berbeza dalam 5 tahun dari 2010-2015 dan adakah ia semakin menurun.

21. PR-1333-L71565  
**Dr. Mansor bin Abd Rahman [ Sik ]** minta **MENTERI KOMUNIKASI DAN MULTIMEDIA** menyatakan apakah Kementerian mempunyai rancangan bagi memastikan syarikat-syarikat telekomunikasi diwajibkan untuk menyediakan 'coverage' secara menyeluruh bagi talian komunikasi dan internet di kawasan-kawasan luar bandar seperti Parlimen Sik di mana sehingga kini masih berada di tahap liputan dan internet yang tidak memuaskan.
22. PR-1333-L71317  
**Tuan Zairil Khir Johari [ Bukit Bendera ]** minta **MENTERI KEWANGAN** menyatakan sama ada Kerajaan bercadang untuk mengagihkan pendapatan cukai kepada negeri-negeri mengikut formula perkongsian cukai seperti mana menjadi kelaziman di negeri-negeri Persekutuan yang lain.
23. PR-1333-L70781  
**Datuk Rozman bin Isli [ Labuan ]** minta **PERDANA MENTERI** menyatakan bahawa pengusaha bas sekolah di Sabah dan Labuan dikatakan terpaksa beroperasi dalam keadaan rugi dan mengakibatkan bilangannya semakin berkurangan. Apakah perancangan Kementerian untuk memastikan perkhidmatan bas sekolah ini menjadi lebih menarik kepada pengusaha dan perkhidmatan lebih berkualiti kepada pelanggan.
24. PR-1333-L71453  
**Dr. Hajah Siti Mariah binti Mahmud [ Kota Raja ]** minta **MENTERI DALAM NEGERI** menyatakan pelan tindakan Kerajaan jangka masa pendek dan panjang untuk mengatasi masalah kemasukan pendatang asing yang tidak terkawal dan mencetuskan pelbagai masalah sosial dan jenayah di dalam negara.
25. PR-1333-L70377  
**Tan Sri Datuk Seri Panglima Joseph Pairin Kitingan [ Keningau ]** minta **MENTERI KESIHATAN** menyatakan berapakah bilangan Pegawai Perubatan Keluarga yang telah diluluskan di Sabah dan berapakah yang telah diisi dan di daerah mana.
26. PR-1333-L70328  
**Tuan Wong Tien Fatt @ Wong Nyuk Foh [ Sandakan ]** minta **MENTERI KEWANGAN** menyatakan setakat ini berapa pendapatan cukai GST yang telah dikutip oleh Kerajaan Persekutuan sejak pelaksanaan cukai GST pada April tahun ini. Senaraikan pendapatan cukai itu mengikut negeri dan bulanan.
27. PR-1333-L70382  
**Dato' Haji Abdul Rahman bin Haji Mohamad [ Lipis ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan usaha Kementerian untuk menaik taraf dan menambah produk-produk jualan di Kedai Rakyat 1Malaysia (KR1M) agar ianya terus mendapat sambutan baik daripada pengguna.

28. PR-1333-L69837  
**Tuan Lim Guan Eng [ Bagan ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan berapa banyak permohonan APDL (*Advertising Permit and Developer License*) pemaju-pemaju swasta Pulau Pinang belum diluluskan dan nilai DGV. Nyatakan sebab kelewatan, tempoh permohonan dan mengapakah diskriminasi yang melanggar peruntukan Perlembagaan dikenakan. Senaraikan permohonan dan kelulusan APDL mengikut pecahan negeri untuk tahun ini.
29. PR-1333-L71302  
**Datuk Wira Haji Ahmad bin Hamzah [ Jasin ]** minta **MENTERI PELANCONGAN DAN KEBUDAYAAN** menyatakan usaha-usaha yang lebih berkesan lagi untuk meningkatkan semula kedatangan pelancong yang telah merosot pada tahun ini sedangkan kemerosotan nilai ringgit tidak berjaya memikat mereka berduyun-duyun berkunjung ke Malaysia.
30. PR-1333-L70397  
**Tan Sri Dato' Seri Abd Khalid bin Ibrahim [ Bandar Tun Razak ]** minta **MENTERI KEWANGAN** menyatakan jumlah dana tahunan daripada Syarikat Berkaitan Kerajaan (GLC) yang telah disumbangkan kepada mana-mana ahli politik individu atau parti politik sejak 1981 hingga 2014 dan sebarang perancangan menghentikan sumbangan seumpama ini.
31. PR-1333-L69600  
**Dato' Abdul Manan bin Ismail [ Paya Besar ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan jumlah rampasan dan nilai barang tiruan yang dijual di Plaza Low Yatt dan Jalan Petaling pada tahun 2010, 2011, 2012, 2013, 2014 dan 2015.
32. PR-1333-L71211  
**Dato' Hasbullah bin Osman [ Gerik ]** minta **PERDANA MENTERI** menyatakan berapakah jumlah masyarakat Malaysia yang berumur 35 tahun ke bawah yang diisytiharkan bankrap. Apakah tindakan mahupun langkah yang boleh dilakukan oleh Kementerian dalam membendung masalah ini.
33. PR-1333-L70745  
**Tuan Haji Ahmad Nazlan bin Idris [ Jerantut ]** minta **MENTERI PENDIDIKAN** menyatakan secara terperinci apakah program-program yang telah dilakukan oleh pelajar-pelajar dari SJK dalam memupuk semangat perpaduan bagi melahirkan pelajar yang cintakan perpaduan dan saling hormat menghormati di antara satu sama lain.
34. PR-1333-L70539  
**Puan Hajah Normala binti Abdul Samad [ Pasir Gudang ]** minta **MENTERI PENGANGKUTAN** menyatakan tahap dan kualiti teknologi radar yang digunakan oleh kapal-kapal di Malaysia termasuk kapal perdagangan kerana berlakunya kes-kes di mana terdapat kapal-kapal yang ditawan lanun, namun kita tidak dapat mengesan kewujudan kapal lanun dalam sistem radar mereka.

35. PR-1333-L69626  
**Puan Hajah Zuraida binti Kamaruddin [ Ampang ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan perbezaan antara caj perkhidmatan yang dikenakan oleh hotel, premis makanan dan minuman dengan cukai perkhidmatan yang dikenakan oleh Kerajaan.
36. PR-1333-L70004  
**Tuan Haji Khalid bin Abdul Samad [ Shah Alam ]** minta **MENTERI DALAM NEGERI** menyatakan adakah Kerajaan sedang menimbang cadangan memberi kebenaran bekerja kepada pelarian daripada Rohingnya, Syria dan negara-negara lain yang diiktiraf oleh UNHCR sebagai pelarian.
37. PR-1333-L71409  
**Dato' Seri Abdul Hadi bin Awang [ Marang ]** minta **PERDANA MENTERI** menyatakan apakah langkah Kerajaan untuk memperkasakan Sekolah Agama Rakyat (SAR) dan Institusi Pondok sebagai usaha memperkukuhkan lagi pendidikan agama kepada rakyat.
38. PR-1333-L69865  
**Datuk Seri Panglima Haji Abdul Ghapur bin Haji Salleh [ Kalabakan ]** minta **MENTERI PENGANGKUTAN** menyatakan :-
- (a) apakah Kementerian maklum bahawa pengguna-pengguna yang terpaksa menggunakan terminal KKIA 2 sedang menghadapi perkhidmatan, keadaan dan suasana yang amat teruk sekali; dan
  - (b) apakah yang menyebabkan Kementerian dan MAB tidak dapat memindahkan Syarikat Penerbangan AirAsia ke KKIA1.
39. PR-1333-L70337  
**Tuan Wong Chen [ Kelana Jaya ]** minta **MENTERI DALAM NEGERI** menyatakan di manakah Jho Low, Casey Tang, Jasmine Loo, Nik Faisal Ariff Kamil dan Yusof Annuar Yaacob, menurut segala maklumat yang sedia ada.
40. PR-1333-L69950  
**Dato' Shamsul Anuar bin Haji Nasarah [ Lenggong ]** minta **MENTERI PERTANIAN DAN INDUSTRI ASAS TANI** menyatakan kesan kejatuhan nilai ringgit, kejatuhan harga minyak dan perubahan iklim terhadap pengeluaran makanan negara dan apakah langkah Kementerian bagi menghadapinya.
41. PR-1333-L70901  
**Tuan Loke Siew Fook [ Seremban ]** minta **MENTERI KOMUNIKASI DAN MULTIMEDIA** menyatakan apakah KPI negara dalam pencapaian kelajuan dan penetrasi dalam jalur lebar (*broadband*) dan sejauh manakah KPI ini telah dicapai dan langkah-langkah spesifik yang akan diambil oleh Kementerian untuk membangunkan infrastruktur internet negara.

42. PR-1333-L70056  
**Tuan Wong Ling Bui [ Sarikei ]** minta **MENTERI KEWANGAN** menyatakan kenapakah harga minyak di negara ini masih belum diturunkan sedangkan Kerajaan telah berjanji *to float* harga minyak mengikut harga minyak mentah antarabangsa. Harga minyak mentah antarabangsa telah menurun dari US\$110 setong pada tahun 2014 ke kurang US\$50 setong sekarang. Sepatutnya harga minyak sekarang hendaklah tidak kurang daripada separuh harga pada tahun 2014.
43. PR-1333-L70643  
**Datuk Haji Datu Nasrun bin Datu Mansur [ Silam ]** minta **MENTERI KESIHATAN** menyatakan melalui perjanjian TPPA apakah usaha perundingan dalam bab harta intelek (IP) berkenaan dengan isu paten ubat yang jelas bertentangan dengan Perjanjian Doha WTO ke atas (*Trade-Related Aspects of Intellectual Property Rights Agreement*) TRIPS dan Kesihatan Awam.
44. PR-1333-L70655  
**Dr. Ko Chung Sen [ Kampar ]** minta **PERDANA MENTERI** menyatakan :-
- (a) jumlah wang yang dilaburkan oleh dana dari institusi termasuk KWSP, Lembaga Tabung Haji dan Kumpulan Wang Persaraan (KWP) ke dalam Felda Global Venture Holdings (FGV); dan
  - (b) jumlah kerugian yang ditanggung oleh setiap institusi tersebut ekoran kejatuhan harga saham FGV, dan jumlah wang yang ValueCap akan melabur ke dalam FGV berdasarkan sejarah kerugiannya yang ketara.
45. PR-1333-L69902  
**Dr. Azman bin Ismail [ Kuala Kedah ]** minta **MENTERI DALAM NEGERI** menyatakan sama ada benar terdapat sindiket menculik anak-anak untuk dijadikan pengemis seperti laporan Berita Harian pada 25 Mei 2015.
46. PR-1333-L70197  
**Dato' Henry Sum Agong [ Lawas ]** minta **MENTERI DALAM NEGERI** menyatakan bilakah usaha untuk membina sebuah balai polis baru bagi menggantikan bangunan yang lama.
47. PR-1333-L71203  
**Tuan Haji Ahmad Lai bin Bujang [ Sibuti ]** minta **MENTERI PELANCONGAN DAN KEBUDAYAAN** menyatakan adakah pihak Kementerian mempunyai cadangan untuk membina perpustakaan daerah bagi daerah baru Subis dan apakah alternatif yang boleh dicadangkan oleh pihak Kementerian untuk membolehkan penduduk luar bandar di Bekenu dan Niah dalam Parlimen Sibuti mendapatkan sebuah perpustakaan berkualiti bagi memenuhi keperluan rakyat luar bandar mendapat bahan bacaan dan tempat bacaan berkualiti daripada Kerajaan Persekutuan.

48. PR-1333-L71373  
**Datuk Liang Teck Meng [ Simpang Renggam ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan :-
- (a) usaha Kementerian dalam mengawal harga rumah yang semakin melampau sehingga ramai rakyat Malaysia tidak mampu membeli; dan
  - (b) berapakah jumlah rumah mampu milik yang telah dibina oleh Kementerian sejak 2013 mengikut setiap negeri.
49. PR-1333-L69593  
**Dr. Michael Jeyakumar Devaraj [ Sungai Siput ]** minta **MENTERI KEWANGAN** menyatakan pecahan pendapatan bulanan kakitangan Kerajaan dengan memberi bilangan yang menerima di bawah RM1000, RM1001 hingga 2000, RM2001 hingga RM3000, RM3001 hingga 5000, RM5001 hingga 7000, RM7001 hingga 10,000, RM10,001 hingga 15,000 dan RM15,001 ke atas.
50. PR-1333-L69746  
**Dato Sri Dr. Muhammad Leo Michael Toyad Abdullah [ Mukah ]** minta **MENTERI LUAR NEGERI** menyatakan apakah perubahan dari perhubungan Australia-Malaysia selepas perubahan kepimpinan baru Kerajaan Australia.
51. PR-1333-L70963  
**Dr. Ong Kian Ming [ Serdang ]** minta **PERDANA MENTERI** menyatakan maklumat terkini mengenai siasatan SPRM ke dalam penganugerahan projek mini insinerator di Pangkor, Langkawi, Cameron Highlands dan Tioman (Nombor Aduan: SPRM / INFO / 2014 / 18929 dan Nombor Aduan: SPRM / INFO / 2014/19145).



**PADA PERMULAAN URUSAN MESYUARAT**  
**MENGEMUKAKAN RANG UNDANG-UNDANG KERAJAAN**  
**UNTUK BACAAN KALI YANG PERTAMA**

1. **Menteri Pertahanan**

- \* Rang Undang-undang Tabung Angkatan Tentera (Pindaan) 2015.

---

\* Menandakan bahawa Rang Undang-undang ini akan dibawa pada semua peringkat di mesyuarat ini.

**ATURAN URUSAN MESYUARAT DAN USUL-USUL**

1. (D.R. 31/2015) Rang Undang-undang Perbekalan 2016 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (5 November, 2015)**

**[ Menteri Kewangan ]**

**DAN**

**Usul dibuat oleh YAB Menteri Kewangan dan masalah dicadangkan :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh dua bilion ringgit (RM52,000,000,000) dibelanjakan daripada Kumpulan Wang Pembangunan bagi tahun 2016, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2016, yang dibentangkan sebagai Kertas Perintah 42 Tahun 2015, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

**Menyambung semula Perbahasan atas masalah (5 November, 2015)**

2. (D.R. 32/2015) Rang Undang-undang Kewangan 2015 **Bacaan Kali Yang Kedua**  
**[ Menteri Kewangan ]**
3. (D.R. 28/2015) Rang Undang-undang Perbadanan Insurans Deposit Malaysia (Pindaan) 2015 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (22 Oktober 2015)**  
**[ Menteri Kewangan ]**
4. (D.R. 30/2015) Rang Undang-undang Syarikat 2015 **Bacaan Kali Yang Kedua**  
**[ Menteri Perdagangan Dalam Negeri, Koperasi dan Kepenggunaan ]**

5. (D.R. 29/2015) Rang Undang-undang Skim Kepentingan 2015. “  
  
**[ Menteri Perdagangan Dalam Negeri,  
Koperasi dan Kepenggunaan ]**
6. (D.R. 9/2015) Rang Undang-undang Kanun Tatacara Jenayah (Pindaan) 2015 “  
  
**[ Menteri Dalam Negeri ]**
7. (D.R. 12/2015) Rang Undang-undang Keterangan (Pindaan) 2015 “  
  
**[ Menteri di Jabatan Perdana Menteri ]**
8. (D.R. 24/2014) Rang Undang-undang Dadah Berbahaya (Pindaan) (No. 2) 2014 “  
  
**[ Menteri Kesihatan ]**

9. PR-1333-U69963  
**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini. Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah banjir pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang menggelarkan diri mereka sebagai SSKM ini.”

**[ Menteri Dalam Negeri ]**

10. PR-1333-U69964

**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa, terdapat rungutan-rungutan dikalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini. Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini.”

**[ Perdana Menteri ]**

11. PR-1333-U69965

**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini.”

**[ Menteri Pertanian dan Industri Asas Tani ]**

12. PR-1333-U69966

**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehpercayaan rakyat kepada Kerajaan masa kini.”

**[ Menteri Kewangan ]**

13. PR-1333-U70485

**Tuan Ng Wei Aik [ Tanjong ]** akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbau perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

**[ Menteri Dalam Negeri ]**

14. PR-1333-U70272

**Tuan M. Kulasegaran [ Ipoh Barat ]** akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

**[ Perdana Menteri ]**

15. PR-1333-U70255

**Dr. Tan Seng Giaw [ Kepong ]** akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

**[ Menteri Kewangan ]**

16. PR-1333-U70256

**Dr. Tan Seng Giaw [ Kepong ]** akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau in.”

**[ Menteri Sumber Asli dan Alam Sekitar ]**

17. PR-1333-U71552

**Tuan Fong Kui Lun [ Bukit Bintang ]** akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

**[ Perdana Menteri ]**

18. PR-1333-U71553

**Tuan Fong Kui Lun [ Bukit Bintang ]** akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

**[ Menteri Kesejahteraan Bandar, Perumahan dan Kerajaan Tempatan ]**

19. PR-1333-U69805

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

**[ Perdana Menteri ]**

20. PR-1333-U69806

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

**[ Perdana Menteri ]**

21. PR-1333-U69807

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatkali ganda usaha pembinaan rumah-rumah tersebut.”

**[ Perdana Menteri ]**

22. PR-1333-U70769

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina, Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara. BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab.

Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

**[ Perdana Menteri ]**

23. PR-1333-U70770

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa posters dan banners tertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Tetak Cina. Umno perlukan anda”. Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

**[ Perdana Menteri ]**

24. PR-1333-U70772

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

**[ Menteri Kesihatan ]**



25. PR-1333-U70774

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakkan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

**[ Menteri Belia dan Sukan ]**

26. PR-1333-U70776

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

**[ Menteri Dalam Negeri ]**

27. PR-1333-U71195

**Tuan Hee Loy Sian [ Petaling Jaya Selatan ]** akan mencadangkan:-

“Bahawa Dewan ini mengemukakan Undi Tidak Percaya terhadap Perdana Menteri Datuk Seri Najib Tun Razak atas alasan penerimaan “Wang Derma” berjumlah RM2.6 billion yang pada mulanya dinafikan, kemudiannya mengugut untuk menyaman akhbar Wall Street Journal dan akhirnya mengakui wang tersebut diperolehi daripada individu yang berasal dari Timur Tengah.

Dengan tidak menjelaskan mengapa “Wang Derma” ini dimasukkan ke akaun peribadi dan bukan atas nama parti, Dewan juga tidak berpuas hati ke atas siasatan skandal 1MDB yang berlaku di mana “Special Task Force” yang sepatutnya menyiasat skandal ini dibubarkan tanpa memberi sebarang alasan sehingga Peguam Negara Tan Sri Abdul Gani Patail ditamatkan perkhidmatan, pegawai SPRM dipindahkan, pihak polis mengganggu siasatan SPRM dan Bank Negara, Public Account Committee (PAC) yang sedang menjalankan siasatan terhadap kes 1MDB tidak berfungsi akibat daripada empat anggota PAC yang terbabit telah dilantik menjadi Menteri atau Timbalan Menteri oleh Perdana Menteri, Pengarah Cawangan Khas (SB) diberhentikan, Timbalan Pengarah Cawangan Khas dipindahkan ke Jabatan Perdana Menteri tanpa diberi tugasan. Disebabkan masalah yang dinyatakan, Perdana Menteri Datuk Seri Najib Tun Razak telah menjejaskan imej Negara di dunia dan menyebabkan pelabur tidak yakin terhadap Kerajaan sekarang sehingga ekonomi menjadi tidak stabil, serta pasaran saham menjunam teruk dan kejatuhan nilai wang ringgit Malaysia berbanding dengan dolar Amerika Syarikat. Maka rakyat Malaysia tidak lagi percaya terhadap Perdana Menteri dan dengan ini Dewan hendaklah mengambil ketetapan untuk mengemukakan Undi Tidak Percaya terhadap Perdana Menteri.”

**[ Perdana Menteri ]**

28. PR-1333-U70806

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dikedatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

**[ Menteri Kesejahteraan Bandar, Perumahan dan Kerajaan Tempatan ]**

29. PR-1333-U70808

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

**[ Menteri Dalam Negeri ]**

30. PR-1333-U70809

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

**[ Menteri Pendidikan ]**

31. **Dato’ Seri Dr. Wan Azizah binti Wan Ismail [ Permatang Pauh ]** akan mencadangkan :-

“Bahawa Dewan ini tidak ada kepercayaan terhadap Yang Amat Berhormat Pekan Dato’ Seri Najib Tun Razak sebagai Perdana Menteri Malaysia.”

**[Perdana Menteri]**

32. **Tuan Gobind Singh Deo [ Puchong ]** akan mencadangkan :-

“Bahawa mengikut Peraturan Mesyuarat 43 dibaca bersama Peraturan Mesyuarat 99 Peraturan-Peraturan Majlis Mesyuarat Dewan Rakyat, Dewan Yang Mulia ini mengkaji semula dan mengenyahkan keputusan Yang di-Pertua YB Dato Seri Dr. Ronald Kiandee, yang membenarkan usul untuk menggantung Yang Berhormat Tuan Lim Kit Siang, Ahli Parlimen Gelang Patah daripada Perkhidmatan sebagai Ahli Parlimen selama 6 bulan dibahas tanpa rujukan dibuat kepada Jawatankuasa Hak dan Kebebasan sepertimana menurut Peraturan 80A Peraturan-Peraturan Majlis Mesyuarat.”

**[Perdana Menteri]**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

<b><u>TAHUN 2015</u></b>	<b><u>RISALAT/DOKUMEN</u></b>	<b><u>TARIKH DIBENTANGKAN</u></b>
ST.87	AKTA JALAN PERSEKUTUAN 1959 -Perintah Jalan Persekutuan ( Persimpangan Bertingkat Bandar Ainsdale) 2015	16 November 2015
ST.88	AKTA JALAN PERSEKUTUAN 1959 -Perintah Jalan Persekutuan ( Malaysia Barat ) (Pindaan) 2015	16 November 2015
ST.89	AKTA JALAN PERSEKUTUAN 1959 -Perintah Jalan Persekutuan ( Malaysia Barat ) (Pindaan) (No.3) 2015	16 November 2015
ST.90	AKTA JALAN PERSEKUTUAN 1959 -Perintah Jalan Persekutuan ( Lebuhraya Pantai Timur – Fasa 2) 2015	16 November 2015
ST.101	AKTA JALAN PERSEKUTUAN 1959 -Perintah Jalan Persekutuan ( Malaysia Barat ) (Pindaan) (No.4) 2015	16 November 2015
ST.102	AKTA JALAN PERSEKUTUAN 1959 -Perintah Jalan Persekutuan ( Malaysia Barat ) (Pindaan) (No.5) 2015	16 November 2015
ST.109	Laporan Tahunan dan Penyata Kewangan Lembaga Penggalakan Pelancongan Malaysia Bagi Tahun 2014.	16 November 2015